

## **SAMBU NA NGE ! SAMBU NA MONO ! Leso mosi to programme sambu na Noel**

Musoniki : Mama Lorella Rouster, développé pour le ASBL des “Ministères pour Chaque Enfant”

NB : Leso to programme yai lenda vanda presenté na equipe, to na longi mosi. Yo lomba preparatio ya mingi ve, kansi mbote kutanga vo na ntuala, sambu longi to balongi lenda tanga na expresio ti kukonda mpasi. Muntu to bantu ya longa fweti vanda batangi ya mbote. Apart na kuzaba kutanga yo, longi to balongi fweti bakisa inki ntangu kusonga bavisuel. Kana longi kele kaka mosi, mbote yandi tanga, ti muntu ya nkaka kusonga bavisuel. Kana bavisuel ikele ve, bana lenda sala théâtre kusonga inki me salama.

### **Bankunga ya Kwenda Mbote ti Leso Yai :**

Emmanuele

Mwana Nzambi Mene Kuma Awa

Yangala ! Bantu Yonso

### **KUYANTIKA LESO :**

Muntu mosi ta songa ? ti yula ngyifula mosi. Bana fweti pesa mvutu ve. Bangyifula kele kaka sambu bo kuyindula. Kana mwana pesa mvutu, kaka ndima yo ebuna kulanda nswalu bangyifula ya nkaka. Kana muntu kutanga konso ngyifula, yandi sala geste bonso yandi ke yindula ngolo. Na nima, yandi pesa ? na muntu ya nkaka sambu yandi kuyula bangyifula ya nkaka.

- ? Kana nge zingaka na nzo mosi ya kitoko, keti nge ta bika nzo yina ya kitoko sambu na kuzinga na nzo ya poto-poto na bwala ? Sambu na inki muntu ta sala mpidina ? Hmm. **(Longi, sala geste bonso nge ke yindula.)**
- ? Kana nge zingaka ya kiese yonso ti Tata na nge ya luzolo mingi, keti nge ta bika Tata na nge, sambu na kukwenda kuzinga ti bantu ya zola nge ve? Sambu na inki muntu ta sala mpidina? Hmm. **(Longi, sala geste bonso nge ke yindula.)**
- ? Kana nge zingaka na sika ya nge vandaka na bantu mingi ya kusalu ya zolaka kusala konso yina ya nge songa bo, keti nge ta bika sika yina kukwenda kuzinga na sika ya nge mosi fweti sala konso kusalu ya vandaka mfunu? Sambu na inki muntu ta sala mpidina? Hmm. **(Longi, sala geste bonso nge ke yindula.)**

? Kana nge zingaka na sika ya bantu yonso zolaka nge mingi, ti bo yonso vandaka kutuba bandinga ya kitoko, ya mbote sambu na nge konso ntangu, keti nge ta bika sika yina kukwenda kuzinga sikamosi ti bantu ya sekaka nge ti kuvwenzaka nge? Sambu na inki muntu ta sala mpidina? Hmm. (**Longi, sala geste bonso nge ke yindula.**)

### **Transitio na Leso ya Bible:**

#### ***(Kusonga foto ya Yesu, No. 1)***

Mono zaba muntu mosi ya salaka mambu yina yonso, SAMBU NA NGE, TI SAMBU NA MONO. Zina na yandi Yesu Kristo. Yandi vandaka Mwana mosi kaka Nzambi vandaka na yo. Beto bambuka lubutuku na Yandi na ntangu beto binga Noel.

#### ***(Simba Bible na Diboko)***

Beto tala inki Bible ke tuba sambu na Yesu. (**Kangula Bible.**) Beto tala inki mutindu Yandi butukaka. Ntaaaaama, na ntwala nsi-ntoto yai vandaka, Yesu zingaka sikamosi ti Tata na Yandi na Zulu. Yandi vandaka Mwana ya Nzambi, ti Yandi mosi vandaka kibeni Nzambi.

Yandi me zingaka mvu ya mvu. Yandi vandaka Nzambi, yo yina ntangu vandaka ve ya Yandi yantikaka. Yandi zingaka mvu ya mvu, tii kuna. Yandi vandaka eternal—kukonda luyantiku ti kukonda nsuka.

Yesu zolaka Tata na Yandi, ti Tata Nzambi zolaka Yandi. Yonso vandaka kaka kiese na kati na bo. Bo zingaka mpi ti Mpeve ya Nzambi ya Longo, ti bo tatu vandaka **Nzambi mosi kaka.**

#### ***(Songa foto ya wanzio mosi, No. 2)***

Yesu ti Tata na Yandi, bo gangaka bampeve ya beto ke binga bawanzio. Bampeve yai sambaka Yesu lumbu ti mpimpa. Konso ntangu bo vandaka kusonga Yesu nde bo zolaka Yandi, ti bo vandaka kumisa mambote na Yandi. Bo tubaka bandinga bonso, “O, Yesu, Nge keke mbote! Nge keke ya longo!” konso ntangu kukonda nsuka.

#### ***(Songa foto ya bawanzio kusamba Yesu, No. 3)***

Banwanzio yonso ya Yesu gangaka, bo sambaka Yandi, ti bo sadilaka Yandi. Bo vandaka kuna sambu na kusala nswalu konso yina ya Yandi songaka bo ya kusala. O, sika Yesu zingaka na zulu, yo vandaka sika mosi ya kuyituka!

Na nima, ntangu lungaka nde Yesu gangaka nsi-ntoto na beto. Yandi kaka songaka bima kuvanda, ti yo vandaka! Yandi salaka yo ti Tata na Yandi, ti Mpeve ya Longo, bo yonso kusala sikamosi. Yandi salaka bambisi ti banti. Yandi fulusaka ntoto na bima ya mbote ya moyo. ***(Songa bafoto ya chameau ti ya nti, No. 4 & 5)***

Yandi salaka bantu ya ntete. Yandi salaka bantu bakala ti nkento—Papa Adami, bakala ya ntete, ti Mama Eva, nkento na yandi. Bo vandaka bambuta ya beto yonso.

***(Songa foto ya Adami ti Eve ti bambisi ti banti ya Nzambi salaka, No. 6)***

Yesu salaka bima yonso mbote—bampeve ti nsi-ntoto na beto, banti ti bambisi, ti bantu. Kansi mosi na kati ya bawanzio ya Nzambi gangaka, wanzio zina ya Lucifer, yandi zengaka nde sambu na yandi, yandi ta sambu Yesu ve. ***(Songo foto ya wanzio Lucifer, No. 7)***

Yandi mekaka kubenda bawanzio ya nkaka kusamba yandi Lucifer, kansi kusamba Yesu diaka ve. Yina vandaka mbi mosi ya neeene-nene! Sambu na inki bawanzio fweti samba Lucifer? Yandi vandaka ve Nzambi ya gangaka bo! Yandi vandaka kuyiba lukumu ti nzitusu ya Nzambi, kansi yandi vandaka ve Nzambi. Yandi gangaka ata kima mosi ve!

Mambu yai ya mbi pesaka Nzambi kiese ve ata fioti, ebuna Yandi kulaka Lucifer ti losaka yandi tii na nsi-ntoto. ***(Songa foto ya Kubwa ya Lucifer, No. 8)*** Ndambu ya tatu ya bawanzio ya nkaka, bo mpi landaka yandi. Lucifer ti bawanzio ya landaka yandi na rebelio yai, bo kumaka bambeni ya Nzambi.

Na nima Nzambi salaka bakala ti nkento ya ntete ti tulaka bo na nsi-ntoto yai na kati ya jardin mosi ya kitoko, Lucifer salaka bonso na mpila ya luvunu. Yandi kotaka na kati ya nitu ya nyoka. ***(Songo foto ya nyoka, No. 9)***

Na munoko ya nyoka yina, Lucifer kusaka nkento, Mama Eva, na mpila nde yandi kumona bandinga ya Nzambi me songa bo na keti-keti. Yandi kusaka nkento kubuya ndinga ya Nzambi sambu yandi kulemfuka na Yandi ve. Mama Eva salaka disumu ya ntete na kati ya bantu. Na nima, yandi twadisaka bakala na yandi sambu yandi kulemfuka mpi ve na ndinga ya Nzambi me tubila bo. MASUMU me kota nsi-ntoto. Mawaaa! Bakala yai Papa Adami, ti nkento na yandi Eva, bo waka

nsoni na meso ya Nzambi! Na mawa yonso, Nzambi kulaka bo na jardin ya kitoko. *(Songo foto ya bo kubasika na jardin na nsoni, No 10)*

Beto yonso, bana ya Papa Adami ti Mama Eva, beto mpi me buya Nzambi. Beto me lemfuka ve na Yandi. Beto yonso me sala mambu ya pesaka Nzambi kiese ve. Beto me kusa luvunu, beto me yiba, beto me nwana beto na beto, beto me fwa bantu ya nkaka, beto me sala kindoki, beto me lemfuka ve na bibuti na beto, beto me vila Nzambi ya salaka beto, ti beto me sala yina ya beto mosi zolaka kusala. Ntangu yai, beto zaba na ntima nde beto kele coupable na meso ya Nzambi. Beto mpi ke na nsoni.

Beto ke na mfunu ya nkailu sambu Nzambi kuwila beto makasi ve. Na luyantiku, bibuti na beto salaka menga ya bambisi bonso nkailu. Kansi masumu na beto lombaka nkailu ya kitoko kuluta menga ya bangombe ti bansusu ti mameme. *(Songo foto ya mesa-kimenga ti ya kulunsi, No. 11)*

Beto vandaka na mfunu ya nkailu parfait, kukonda kifu, kukonda masumu. Beto vandaka na mfunu ya mpila kufuta mfuka ya masumu beto me sala, sambu Nzambi lenda kulolula beto.

Na nsi-ntoto ya mvimba, nkailu ya kitoko kukonda kifu to masumu, yo vandaka ve. Menga ya bambisi, yo lungaka ve. Bantu lenda ve kupesa nkailu ya kitoko, sambu konso muntu ya me zingaka na nsi-ntoto, beto yonso me sala masumu. Ata muntu mosi ve vandaka ata penepene ya kukonda kifu.

Nzambi zabaka nde beto ta vanda na probleme yai ya nene. Ee, Yandi zolaka beto. Yandi zolaka beto na mpila nde, katuka na luyantiku, Yandi yidikaka mpila sambu na Yandi kulolula beto. Na universe ya mvimba, **kaka** Mosi vandaka ya lenda kuma nkailu ya kitoko, kukonda kifu. Yo yina Nzambi salaka lukanu kupesa nkailu yina, Yandi mosi.

Yandi salaka lukanu kupesa Mwana mosi ya Yandi vandaka na yo, Mwana ya kitoko na Yandi mosi, Mwana na Yandi ya kukonda masumu. Lukanu ya Nzambi vandaka kupesa Mwana na Yandi Yesu Kristo kuvanda nkailu ya kitoko ya ta lunga kufuta mfuka ya masumu na beto. Mwana na Yandi mosi ta manisa makasi ya Nzambi ti beto. Yandi salaka lukanu kupesa Mwana na Yandi Yesu, Mwana na Yandi ya yalaka na zulu—**sambu na nge, sambu na mono.** *(Kusonga foto ya Yesu Ntotila, No. 12)*

Ee, Yesu vandaka Mwana ya Nzambi ya me zinga ti Tata Nzambi mvu ya mvu.  
Yandi vandaka Mwana ya Nzambi special, kaka mosi ya vandaka.

Bible ke tuba nde yo salamaka mutindu yai:

***(Songa foto ya wanzio ke tuba na Maria, No. 13)***

Lumbu mosi, Nzambi tindaka mosi ya bawanzio ya mbote, ya kwikama, na nsi-  
ntoto. Zina ya wanzio yina Gabriele, ti Nzambi tindaka yandi na ndinga mosi  
special sambu na Maria. (Luka 2:26, ff) Maria vandaka jeune nkento ya me zaba  
ntete bakala ve. Yandi me sila kukwela bakala mosi ya zolaka Nzambi, bakala  
zina ya Yozefi, kansi bo me lala sikamosi ntete ve.

Wanzio yai Gabriele pesaka mbote na Maria, ti songaka yandi nde na nlemvo ya  
Nzambi, Yandi me sola yandi Maria sambu na kisalu mosi ya mfunu. Maria  
bakisaka ve. Inki wanzio yina vandaka kusonga yandi?

***(Songa foto ya zina Jésus, Yesu, No. 14)***

Wanzio songaka Maria nde yandi ta baka divumu, ebuna yandi ta buta mwana-  
bakala. Yandi fweti pesa mwana yina zina, Yesu, disongidila nde, “Mvulusi.”

**Bana repeter na ritime:**

Pesa yandi zina Yesu.

Yandi ta vanda Mvulusi.

Wanzio tubaka nde mwana yina ta vanda muntu ya nene—Mwana ya Nzambi—  
Mvulusi ya Nzambi silaka ntaaama—Mesia. Yandi ta yala mvu ya mvu !

**Bana sala bageste :**

Bana sala bageste bonso bo ke sonika cercle mosi ya nene na mupepe. Bo  
landa kaka kusala cercle yina diaka ti diaka. Ntangu bo ke sonika na  
mupepe, bo tuba nde, “Mvu ya mvu ! Mvu ya mvu ! Yesu ta yala mvu ya  
mvu,” etc.

Kansi Maria bakisaka ve. Yo ke lomba mama **ti tata** kusala bebe. Yandi zabaka  
nde ata mbala mosi ve yandi me vanda ti bakala na mpila ya lenda sala bebe. Ata  
Yozefi, fiancee na yandi, yandi me vanda ti yandi mpidina ve. Ebuna, inki  
mutindu yandi lenda baka divumu ti buta mwana ?

Wanzio pesaka mvutu ya ngiyifula yina. Yandi tubaka nde Mpeve ya Longo ya  
Nzambi ta kuma na yandi. Yandi ta baka divumu na nitu ya bakala ve, kansi na

ngolo ya Nzambi. Mwana ya longo ya yandi ta buta, Yandi ta vanda Mwana ya Nzambi kibeni! Ee, mambu yina lenda salama ve na bantu, kansi wanzio bambukisaka yandi nde Nzambi lunga sala mambu yonso.

Ebuna Maria ndimaka lukanu ya Nzambi yai ya kuyituka. Yandi tubaka kaka nde, “Mono keke sielo ya Mfumu Nzambi. Bika yo salama na mono na mpila ya Nzambi me tuba.”

Kaka na minute yina, mambu mosi ya yituka salamaka. Yesu, Mwana ya Nzambi, yandi ya zingaka mvu ya mvu na kintwadi ti Tata na Yandi na zulu, Yandi kotaka divumu ya Maria. Yandi yantikaka kuyela na divumu ya Maria bonso bebe mosi ya fioti.

Yesu yelaka na divumu ya Maria bangonda uvwa bonso bana ya nkaka ke yela. Kansi Yandi vandaka ve bonso bana ya nkaka. Yandi vandaka Mwana ya Nzambi kaka mosi ya keke, ya kumaka bebe na mpila nde lumbu mosi, Yandi lenda kuma nkailu ya kitoko ya kukonda kifu, ya kukonda masumu, kupesa mfuka sambu na mambu yonso ya beto me sala ya mbi. *(Songa foto ya bebe Yesu, No. 15)*

Wanzio songaka Yozefi mpi inki vandaka kusalama, ebuna yandi kwelaka Maria ti bakaka yandi na nzo na yandi kuvanda nkento na yandi. Kansi Bible ke songa beto nde, ata bo me kwela bonso bakala ti nkento, Yozefi lalaka ve ti Maria tii na nima mwana Yesu me butuka. (Matayo 1:25)

Bu ntangu me kuma penepene sambu na Maria kubuta, muntu ya yalaka ntoto na bo salaka nsiku nde bantu yonso fweti vutuka na bwala na bakala ya fami, sambu na kufuta mpaku ya leta.

*(Show foto ya chameau ke kwenda na bwala, No. 16)*

Yozefi ti Maria, bo vutukaka na Beteleme, bwala ya Yozefi. Bwala vandaka fuluka ya bantu ya me kwisa mpi kufuta mpaku. Ata sika mosi ve me monika na kati ya banzo ya banzenza. Kaka sika mosi ya Maria ti Yozefi monaka sambu na kubaka repos, yo vandaka na kati ya nzo ya bambisi.

Kuna, na nzo ya bambisi, Mfumu Yesu Kristo butukaka. Yandi bikaka nzo ya kitoko na Yandi na zulu kukwenda kubutuka na nzo ya bambisi—**sambu na nge, sambu na mono!**

***(Songa foto ya Maria, Yozefi ti mwana na nzo ya bambisi, No. 17)***

Maria vandaka ve na bilele ya kitoko bonso bebe ke lwataka. Yandi bakaka kaka kitini ya lele ya vandaka ya mvindu ve. Yandi tulaka lele yina na lweka na bebe Yesu sambu Yandi kuvanda madidi ve.

Yesu, ya vandaka mvwama na zulu, kumaka nsukami sambu Yandi lenda kuma Mvulusi na beto, nkailu ya kitoko sambu na beto, ya lenda vutula kinduku na beto ti Nzambi.

Ntangu Yesu yelaka, Yandi salaka disumu ata mosi ve. Konso ntangu Yandi salaka kaka mbote. Konso ntangu Yandi salaka yina ya pesaka Tata Nzambi na Yandi kiese.

***(Songa foto ya Yesu ke belula muntu, No. 18)***

Yesu belulaka bamalade mingi, ti Yandi longaka malongi mingi ya kitoko. Konso ntangu Yandi vandaka kusala bisalu ya mbote na konso sika Yandi kwendaka.

***(Songa foto ya Yesu na zulu ya kulunsi (bakulunsi 3, Yesu na kati), No. 19)***

Kansi bantu ya nkaka waka kimpala sambu na Yesu. Bo tubaka luvunu sambu na Yandi, ebuna bo tulaka Yandi na zulu ya kulunsi, ti bo fwaka Yandi.

Yesu monaka mpasi mingi, ebuna Yandi fwaka, kaka na mpila ya Nzambi yidikaka na lukanu na Yandi ya ntama. Yandi fwaka bonso nkailu ya kitoko ya Nzambi sosaka, nkailu kukonda masumu. Yandi fwaka na sika na beto. Sambu Yandi kufwaka ti Nzambi ndimaka nkailu yina, Nzambi lenda kulolula beto.

***(Songa foto ya maziamu ya kukangula, No. 20)***

Yesu bikalaka ve na lufwa. Na nima ya bilumbu tatu na maziamu, Yandi telamaka na lufwa. Bantu mingi monaka Yandi, na nima Yandi me telama na moyo.

Bilumbu 40, bantu mingi monaka Yandi na moyo. Na nsuka, Yandi vutukaka na Tata na Yandi na zulu. Kisalu na Yandi awa na nsi-ntoto yai, Yandi me manisa yo yonso.

***(Songa foto ya muntu ya ke bika kizitu na yandi na kulunsi No. 21)***

Yesu bikisaka zulu sambu na kuvanda Mvulusi na beto. Yandi salaka yo sambu na mono. Yandi salaka yo sambu na nge. Keti nge ta bika kizitu na nge ya masumu na kulunsi ya Yesu? Keti nge ta yamba Yandi bonso Mvulusi ti Mfumu na nge ? Keti nge ta ndima Yandi sambu Yandi lolula masumu na nge ? Keti nge ta pesa Yandi nzila kupesa nge moyo ya mpa, kukitula nge mwana ya Nzambi ?

Yandi salaka yai yonso sambu na mono, sambu na nge. Nge ta sala inki sambu na Yandi bubuyai ?

(Longi, songa bantu wapi bo lenda kutana ti nge kana bo sosa lusadisu kuyamba Yesu.)

====

NSUKA YA LESO

====

**Atasio, Longi!** Kana nge me manisa kusadila lesu yai special ya Noel, vutula yo na Centre des Materiels ya MCE sika nge me baka yo. Bantu ya nkaka ke kinga kusadila yo mpi na mabundu na bo. Bana mingi lenda kuma na Yesu kaka sambu nge vandaka kwikama kuvutula lesu yai na ntangu ya mbote. Nge mpi na profiter, sambu nge lenda defa diaka materiels ya mpa kana nge me vutula ntete lesu yai. Matondo mingi sambu na collaboratio na nge! Nzambi sakumuna nge ti malongi na nge.